

VENDIM
Nr. 32, datë 21.1.2015

**PËR DISA SHITESA NË VENDIMIN NR. 229, DATË 23.4.2004, TË KËSHILLIT
TË MINISTRAVE, "PËR MIRATIMIN E CEREMONIALIT ZYRTAR TË
REPUBLIKËS SË SHQIPËRISË", TË NDRYSHUAR**

Në mbështetje të nenit 100 të Kushtetutës dhe të neneve 12, pika 2, e 49, pika 1, të ligjit nr. 9095, datë 3.7.2003, "Për shërbimin e jashtëm të Republikës së Shqipërisë", me propozimin e ministrit të Punëve të Jashtme, Këshilli i Ministrave

VENDOSI:

1. Në pikën 2, "Përdorimi i sallës VIP të Aeroportit", të kapitullit V, "Vizita dhe takime", të vendimit nr. 229, datë 23.4.2004, të Këshillit të Ministrave, të ndryshuar, pas pikës 2.11 shtohen pikat 2.12 deri në 2.25, me këtë përmbajtje:

"2.12 Në sallën VIP të aeroportit "Nënë Tereza", ngrihet dhe funksionon salla VIP nr. 3.

2.13 Salla VIP nr. 3 mund të rezervohet nga:

- kompani të huaja apo vendase;
- ambasada të huaja rezidente apo jorezidente në Tiranë;

- organizata ndërkombëtare dhe përfaqësi të biznesit vendas dhe të huaj;

- sportistë që kanë fituar medalje në aktivitetet kombëtare apo ndërkombëtare.

2.14 Rezervimi i sallës VIP nr. 3 nga subjektet e lartpërmendura bëhet në Protokollin e Shtetit, jo më vonë se 48 orë përpara mbërritjes apo largimit të subjektit kërkues, dhe miratimi i shërbimit i përcillet, me shkrim, sallës VIP nr. 3, në aeroport.

2.15 Subjekti kërkues, së bashku me kërkesën për përdorim të sallës VIP nr. 3, duhet të përcjellë edhe listën e plotë të pasagjerëve udhëtues, itinerarin dhe numrat e dokumentit të udhëtimit.

2.16 Subjektet, që kanë marrë miratimin e Protokollit të Shtetit dhe që do të lejohen të përdorin sallën VIP nr. 3, duhet të kalojnë procedurat korrekte të kontrollit fizik, bagazhit e të dokumentacionit dhe, në asnjë moment, nuk janë objekt i shmangies së tyre.

2.17 "Albcontrol", sh.a. ngarkohet me sigurimin e shërbimeve që do të ofrohen në sallën VIP nr. 3. Këto shërbime përfshijnë:

a) lejin e hyrjes në zonën e parkimit VIP të automjetit me të cilin udhëton subjekti kërkues i shërbimit;

b) pritjen dhe akomodimin në sallën VIP nr. 3;

c) kontrollin dhe vulosjen e pasaportës;

ç) transportin e bagazhit të dorës;

d) ofrimin e shërbimit bufe, TV, internet dhe lehtësi të tjera.

2.18 Tarifat për shërbimin e sallës VIP nr. 3 dhe të gjitha shërbimet që ofrohen do të jenë të afishuara në faqen zyrtare të Ministrisë së Punëve të Jashtme, së bashku me formularin që duhet plotësuar me të dhënat individuale të udhëtarëve dhe kërkesën tip që duhet të depozitohet për miratim në Protokollin e Shtetit.

2.19 Pas miratimit të dhënë nga Protokollin e Shtetit për shfrytëzimin e sallës VIP nr. 3, subjekti i interesuar do të depozitojë, nëpërmjet transfertës bankare, tarifën përkatëse, sipas tabelës në shtojcën bashkëlidhur këtij vendimi.

2.20 Hyrja në sallën VIP nr. 3 dhe përfitimi i shërbimeve në këtë sallë bëhen vetëm pas dorëzimit, pranë personelit të shërbimit, të faturës së pagesës së shërbimit të kërkuar dhe miratimit paraprak të Protokollit të Shtetit.

2.21 Protokollin e Shtetit do të jetë autoriteti i vetëm që do të vendosë shmangien e tarifave të mësipërme, vetëm në rastet e vizitave zyrtare apo rastet e respektimit të reciprocitetit.

2.22 Modalitetet e përdorimit të sallës VIP nr. 3 dhe kategoritë që e përfitojnë këtë shërbim përcaktohen dhe miratohen paraprakisht nga Drejtoria e Protokollit të Shtetit. Në të gjitha rastet e përdorimit të sallës VIP nr. 3, Protokollin e Shtetit i jep përparësi trajtimit dhe shërbimit të zyrtarëve

shtetërorë që përfitojnë shërbimin e sallave VIP nr. 1 dhe nr. 2.

2.23 Tarifat për pijet, ushqimet dhe shërbime të tjera në sallën VIP nr. 3 përcaktohen në përputhje me shtojcën që i bashkëlidhet këtij vendimi.

2.24 Të ardhurat e arkëtuara nga përdorimi i sallës VIP nr. 3 i kalojnë 50 për qind buxhetit të shtetit, për Ministrinë e Punëve të Jashtme, dhe 50 për qind buxhetit të “Albcontrol”, sh.a.

2.25 Procedurat për ofrimin e shërbimeve dhe kriteret për përcaktimin e subjekteve përfituese të këtij shërbimi miratohen me udhëzim të përbashkët të ministrit të Punëve të Jashtme dhe ministrit të Zhvillimit Ekonomik, Tregtisë dhe Sipërmarrjes.”.

2. Ngarkohen Ministria e Punëve të Jashtme, Ministria e Zhvillimit Ekonomik, Tregtisë dhe Sipërmarrjes dhe Ministria e Financave për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Edi Rama

SHTOJCË

TARIFAT E SHËRBIMIT TË SALLËS VIP NR. 3

Tarifat e shërbimit në sallën VIP nr. 3 për të gjitha subjektet, të cilat do ta përfitojnë atë, do të jenë fikse për çdo orë shërbimi të kërkuar.

Tarifa e shërbimit në sallën VIP nr. 3, gjithashtu, do të jetë e ndryshme edhe në bazë të numrit të pasagjerëve të çdo subjekti kërkuar. Shërbimi do të ofrohet kundrejt pagesës, sipas kësaj tablele:

Shërbimet	Tarifa në nisje	Tarifa në mbërritje
Pritje, akomodim, shfrytëzim, shërbim bufe i sallës VIP nr. 3, transport VIP deri në avion për subjekt nga 1 deri në 5 vetë.	300 euro	300 euro
Pritje, akomodim, shfrytëzim, shërbim bufe i sallës VIP nr. 3, transport VIP deri në avion për subjekt nga 5 deri në 10 vetë.	500 euro	400 euro
Pritje, akomodim, shfrytëzim, shërbim bufe i sallës VIP nr. 3, transport VIP deri në avion për subjekt nga 10 deri në 20 vetë.	1000 euro	900 euro